

's Reschym vo dr erschte Zunftmalschtere

(dr Albdraum vo de Zunftheere)

Vo Pfuus kai Reed, herjee,
Hylt neischterdings der N.C.G.
Au d'Stachle het me steene heere;
E-n-Albdraum dät sy Schlefli steere.
Vo Fraue wurd drum näggschtens scho
's Zunftregimänt schynts ibernoh.
Pathetisch schweere

Die zwai Heere:

In ihri Zimft kenne sich Fraue-n-ineschlyche,
Numme, wenn si 's haue-n-iber ihri Lyche.

Doch hilft do alles Resoniere nyt, denn ibers Johr, im näggschte
Hornig,

Hän unseri Zimft, wär waiss, e neiji



ORNIG!



In erschter Linie dringgt me Milch uf de Stubene statt Wy
Und 's jasse loht me gscheiter sy.
Verbodde-n-isch es, wieschti Witz z'verzelle,
Agrichtet wird jetz mit ere glaine Kelle,
En Aeschemittwuchmähli no-n-em Doggter Bircher-Benner,
No der Fridel Struss und andere Rohkoschtkenner.
und isch aim sone Frass nit rächt,
So sait me lieber, 's syg nit schlächt.
Me muess jetz ebe frässe ohni Grimme,
Was d'Fraue in der Zimft beschimme.
Am elfi zoobe-n-isch scho Rueh,
Der Stubegnächt macht d'Stube zue.
Und d'Hailsarmee mit Halleluja, Gloria,
Beglaltet d'Zimfter haim, verdoria,
Dass kaine meh ka Syteschpringli woge,
Us isch au das und 's Mammi wird niemeh betroge.
Uff ai Wort, me läbt jetz vernimftig
Syt d'Fraue ebefalls dien zimftig
Mitmache-n-in de Zimft, regiere,
Und wie dehaime-n-als die grossi Rehre fiere.
Der Gipfel aber, zimftig kame
Nimme wärde-n-ohni giftigi Exame.
E Priefig macht me jetz im Strigge,
Im Maschestich, im Soggefligge;
Au Buschi sott me wiggle kenne,

Bim Suppekoche sich der Doope nit verbrenne,
Und weiss der Gugger was fir Sache,
E Zumftexame- 's isch zem Lache.
Mit weler Zumft sich weli Fraue dien verbinde,
En Ukas duet's em Volgg verkünde:
D'Wylte wird de Suffraget(t)ene-n-ihri Zumft,
D'Dienschtbloze finde by der Mägd persee e gueti Unterkumft.
Im Schlissel seht me die verkehre,
Wo z'Nacht der Alt dien useschpeere,
Dass är nit ka go plausche, kaigle, jasse,
He jo, das alles wurd em Schtigg nit passe.
D'Schpinnwättere nimmt die Wyber uff,
Wo spinne, wättere, kaife, wo gehn muff.
Und by de Gärtnera wird me kenne finde,
Sälteni Pflänzli, Zimmerlinde.
In d'Akademisch Zumft dien's have,
D'Deggter- und Brofässersfraue;
Drzue d'«Lehrgotte»-n-usem Affekaschte,
Wo ihr Gwisse dien mit Streik belaschte.
Die ainzigi Zumft wo ganz usgschlosse
D'Fraue blybe, sin d'Husgnosse.
Dert wird me nämlig d'Fidleburger finde,
Wo wäge Laschter, wäge Sinde
Z'obe mien husgnessig blybe,
Wo mit Gschirz abwäsche, Baby sitte, d'Zyt vertrybe.

So wird regiert, befohle-n-und verbotde,
Wenn in de Basler Zimft sich d'Fraue zämmerodde.

Am Zyschtig gehn nadyrlig alli Zumftbobbli in
d'Ladärne-n-Usschtellig in der Rundhofhalle
vo der Muschtermäss.